

Lancastrenses. Verum maximus honor huic accessit, quod Comitatus titulo ab Henrico Octavo exornatum fuerit, cum Henricum Daubeneium Comitem de *Bridgewater* creaverit, cujus soror & una hæredum Cecilia enupta fuit Ioanni *Bourchier* primo ex ea familia Bathoniæ Comiti.

Sub hoc, post pauca milliaria, vasto ostio in Sabrinianum fretum evolvitur *Pedredus*, quod, ut diximus, *VZELLA* æstuarium Ptolemæo dicitur, nonnullis etiam hodie *Evelmouth*, sed Anglis veteribus *Peopesan muð*, ubi, ut author est *Marianus*, palantem Danorum exercitum *Ealstanus* Episcopus *Shirburnensis*, circa annum Salutis *DCCCXLV*, profligavit. Eodem etiam æstuario aliud obvium occurrit flumen, *Brius* nonnullis dicitur, qui oritur è sylva illa amplissima, in Orientali huius agri limite, quam *Britanni Coit Maur*, Saxones *Selwood* dixerunt, id est, interprete *Asferio*, *Sylva magna*, non procul à *Pen* ignobili viculo, ubi in Britannici nominis exitium, & Danorum cladem *Mars* conspirasse videatur. *Keniwalchus* enim *Westfaxo* ita secundo prælio hic Britannos attrivit, ut vix postea pugnandi copiam Saxoni fecerint: & multis post sæculis, eodem loco, *Edmundus* cognomento *Ferreum latus*, Danos memorabili prælio devicit, cum *Danicum Canutum*, qui regnum occuparat, undique agigaret. Hic fluvius primum *Bruiton* à se cognominatum invisit, *Mojonorum* tumulis ce- lebre, qui ibi cœnobium construxerunt; longæque per viculos defluens, nonnullis rivulis auctior lætos gramine campos irrigat, cumque solum mollius invenerit, quodammodo stagnat, insulamque ambit *Avallon*, à pomis Britannice olim sic dictam, postea *Inis Wirin*, id est, *Vitrea insula*, & eadem significatione *Glasten-ey*, Latinisque *Glasconia*. De qua Poëta satis antiquus,

*Insula pomarum qua fortunata vocatur,
Ex re nomen habet, quia per se singula profert.
Non opus est illi fulcantibus arva colonis,
Omnis abest cultus, nisi quem natura ministrat,
Vltro sæcundas segetes producit, & herbas,
Nataque poma suis prætonso germine sylvis.*

In hac floruit Monasterium *Glastenbury*, quod admodum antiquam repetit originem, à *Iosepho* scilicet *Arimathensi* illo, qui Christi corpus sepulchro mandarat, quemque *Philippus* Gallorum Apostolus in Britanniam misit, ut Christum prædicaret. Hoc enim & antiquissima huius monasterii monumenta testantur, & *Patricius* Hiberniensium Apostolus, qui xxx annos vitam monasticam hic egit, in sua prodidit epistola. Unde hic locus à maioribus nostris dictus, *Prima terra Dei. Prima Sanctorum terra in Anglia. Origo & fons totius religionis in Anglia. Tumulus Sanctorum, Mater Sanctorum, & ab ipsis Domini discipulis edificata.* Nec est cur hac de re ambigamus, cum antea docuerim Christianam religionem in prima enascentis ecclesiæ infantia huic nostræ insulæ illuxisse, & *Freculphus* *Lexoviensis* scripserit, *Philippum* illum barbaras gentes, vicinasque tenebris, & Oceano conjunctas ad scientia lucem fideique portum deduxisse. Sed ad Monasterium, & ex *Malmesburienfis* hac de re libello. Cum antiqua illa ædicula à *Iosepho* posita vetustati tandem aliquando cederet, *Devi Mevenensis* Episcopus novam eo loci construxit, quæ cum jam etiam ævo fatisceret, duodecim

viri à Boreali Britannia parte profecti eam restaurarunt, tandemque *Ina Rex*, (qui scholam Romæ ad Anglicam juventutem erudiendam fundavit, & ad eam sustentandam eleemosynamque Romæ distribuendam, singulis regni sui ædibus denarium imposuit) hac demolita, magnificum admodum Christo, Petro, & Paulo con-

Anno 698.

*Syderei montes, speciosa cacumina Sion,
A Libano gemina, flore comante, cedri;
Cælorum porta, lati duo lumina mundi,
Ore tonat Paulus, fulgurat arce Petrus.
Inter Apostolicas radianti luce coronas,
Doctior hic monitis, celsior ille gradu.
Corda per hunc hominum referantur, & astra per illum:
Quos docet iste stylo, suscipit ille polo.
Pandit iter cæli hic dogmate, clavibus alter,
Est via cui Paulus, janua fida Petrus.
Hic petra firma manens, ille Architectus habetur,
Surgit in his templum quo placet ara Deo.
Anglia plaude lubens, mittit tibi Roma salutem,
Fulgor Apostolicus Glasconiam irradiat.
A facie hostili duo propugnacula surgunt,
Quot fidei turris urbs caput orbis habet.
Hæc pius egregio Rex Ina refertus amore,
Dona suo populo non moritura dedit.
Totus in affectu diæ pietatis inherens,
Ecclesiæque juges amplificavit opes.
Melchisedech noster merito Rex, atque Sacerdos,
Complevit veræ religionis opus.
Publica jura regens, & celsa palatia servans,
Unica Pontificum gloria, norma fuit.
Hinc abiens, illinc meritum fulget honore,
Hic quoque gestorum laude perennis erit.*

Hic versus
pauculis
immutatis
habetur
in lib. 4
Poëma-
tum Ve-
nantii
Fortunati,
partim in
laudem
Ecclesiæ
Parisiensis,
partim
Nanne-
tensis.

Primis his temporibus viri sanctissimi hic Deo invigilarunt, & præcipue Hibernici, qui stipendiis regis alebantur, & adolescentes pietate, artibusque ingenuis instruebant. Solitariam enim vitam amplexi sunt, ut majore cum tranquillitate sacris literis vacarent, & severo vitæ genere ad crucem perferendam se exercerent. Sed tandem *Dunstanus* subactò ingenio homo, cum in principum consuetudinem se penitus sanctitatis & doctrinæ opinione immerisset, pro his, recentioris instituti monachos, scilicet *Benedictinos* induxit, ipseque primus numeroso Monachorum gregi hic præfuit: qui à bonis, & piis principibus plusquam regias opes consequuti. Cumque omni rerum affluentia sexcentis annis quasi regnassent, (eorum enim nutum vicini omnes spectarunt) ab *Henrico VIII* exturbati sunt, Monasteriumque, quod jam in urbem excreverat, dirutum, & solo adæquatum, quantum & quam magnificum fuerit ruinis demonstrat.

Ex illis qui vana mirantur hoc ævo videar, si meminerim de juglande quæ hic nunquam folia ante festum sancti *Barnabæ* profert, & ipso die festo foliis luxuriat; & de corno (si *Hawthorne* sic vocamus) quæ ipso Christi natali, perinde ac mense Majo, progerminat. Hæc tamen verissima (si qua fides) plurimi fide digni produnt. Antequam me hinc recipiam, accipe paucis, quod pluribus *Giraldus Cambrensis* oculatus testis, de sepulchro *Arthuri* in huius cœmiterio retulit.

Cum *Henricus Secundus* Rex Angliæ ex

Comes de
Bridge-
water.

Vzella.

Selwood.

Guil. Mal-
mesburien-
sis de Anti-
quitate Glas-
conia.Vide Ro-
man. in
Britannia
pag. 47.
In Con-
firm. H. 2.